

ОҚУ – ҮЗДІКТЕРДІҢ ЫСТЫҚ ҰЯСЫ

Бүгінгі жастар белгілі бір мамандық иесі болып қана қоймай, бәсекеге қабілеттілікті қалыптастыруы тиіс. Иә, қазіргі заманның даму үрдісі жастардан жоғары білім алумен бірге шығармашыл, іскер және ізденімпаз болуды талап етеді. Ол үшін әрбір жоғары оқу орны өз студентінің тұлға ретінде қалыптасып, дамуына қолайлы жағдай жасауы тиіс. Оңтүстік өңірдегі ең іргелі оқу орны – М.Әуезов атындағы Оңтүстік Қазақстан университетінің басты стратегиялық мақсаты осы айтылған міндеттерге сай келеді. Ондағы білім берудің кешенді бағдарламасы студент-жастарды білікті маман ретінде даярлау ғана емес, жан-жақты дамыған, отансүйгіш, ұлтжанды азамат етіп қалыптастыру қамтылған.

«Бәсекелестік қабілет дегеніміз – ұлттың аймақтық немесе жаһандық нарықта бағасы, я болмаса сапасы жөнінен өзгелерден ұтымды дүниені ұсына алуы. Бұл материалдық өнім ғана емес, сонымен бірге, білім, қызмет, зияткерлік немесе сапалы еңбек ресурстары болуы мүмкін» деп Елбасы Н.Назарбаев атап өткендей, студенттердің сапалы мамандық алып шығуы үшін барлық жағдайлар мен мүмкіндіктер жасалған.

Айталық, білім ұясындағы 10-нан астам түрлі бағыттағы үйірмелерде әр студент бос уақытын тиімді пайдалана отырып, шығармашылығын жан-жақты дамытуына, өзін-өзі шыңдауына толық мүмкіндік бар. Соның ішінде арнайы «Шығармашылық кәсіптер факультетінің» негізгі мақсаты – талап қуған әрбір жастың шығармашылық бастауын айқындап беріп, қайнар көзін ашуға бағытталған. Бұл бағыт студенттің тұлғалық тұғырға көтерілуіне көмектеседі, әрі әлемді қусырып тұрған нарық заңына сәйкес іс-әрекеттерге бейімдеп, өз талантына сай қосымша жұмыс көзін табуға жол ашады.

Факультетте әртүрлі көркемдік-шығармашылық бағыттағы ән, би, «Көңілді тапқырлар клубы», дәстүрлі ән мен терме, домбыра, айтыс және ақындық өнер, дефиле, көркем сөз шеберлері курстары бар. Сондай-ақ, олар вокалды аспаптар ансамбліне, Үнді орталығының үйірмелеріне қатысқаны, қоғамдық мамандықты меңгергені жайлы сертификат алып шығады.

Мұны баса көрсетіп отырған себебіміз осы факультетте қосымша білім алған жастардың арасында өз талантын шыңдап, бүгінде биік белеске көтерілген, ел таныған дарындарымыз бар. Осынау үлкен асуларды бағындырған түлектерімізді мақтанышпен айтар болсақ, эстрада жұлдыздарының ішінде Хадиса Сейітова, Еркін Нұржанов, «Жігіттер квартеті», Айнұр Назарбекова, Астана Қарғабай, Дана Мақатаева, Ақмарал Биназарова, Мамадияр Тәукеев сынды түлектеріміз, сондай-ақ, «Песни» шоу-конкурсының финалисі Назима Жәнібекова – бүгінде елге танымал әншілердің қатарында.

«Қоғамдық кәсіптер» факультетіндегі көңілді тапқырлар клубы үйірмесінің қатысушыларынан

құралған «Байдың балалары» командасы Жайдарман ойындарының 2018 жылғы чемпионы атанды. «Дефиле» үйірмесінің студенттері әр жылдары «Шымкент аруы» конкурсына қатысып, жүлделі орындарды иеленіп жүр. Әсем Нұралиева (2014), олардың қатарында Тоғжан Бекжігіт (2015), Айда-на Ниязбек (2017), Айғаным Ниязбек (2018) Гран-при және басқа да жүлделерді иеленуде. Сондай-ақ, Бекжігіт Тоғжан (2016), Айдана Ниязбек, Салима Бейсенғалиева сынды өнерпаз жастар «Қазақстан аруы» байқауына қатысып, өлкеміздің намысын қорғады.

Қырандарды қанаттандырып, тұлпарларды тағалауда аянбай тер төгіп жүрген Қазақстанның еңбек сіңірген қайраткерлері, ҚР мәдениет майталмандары, С.Абдрайымова, К.Оралова Халықаралық конкурстардың лауреаттары А.Алпысбай, А.Ортаева, Ж.Нұржанова, А.Назарбекова, А.Ысқақова, Л.Ергебекова секілді білікті мамандар факультеттегі білім беру ісінің мақтаныштары.

Университетте салауатты өмір салтын ұстанып, спортпен шұғылдану үшін барлық мүмкіндік бар. Оқу-жаттығу орталығында «Денсаулық», «Буревестник» спорт кешендері мен жаттығу залдарында кәсіби және әуесқой жаттығу түрлерінен 20-дан аса секциялар жұмыс істейді. Жыл сайын студенттер арасында, оқытушы-профессор құрамы мен қызметкерлер жоспарлы түрде спартакиадалар, сайыстар мен ұлттық лигалар ұйымдастырылып тұрады.

Аталған үйірмелерге қатысып, дене шынықтыру мамандығында оқып жүрген спортшы студенттер республикада ғана емес, Азия, әлемдік және халықаралық сайыстарда топ жарып, үлкен жетістіктерімен қуанып жүр. Атап айтқанда, 4-курс студенті Ж.Шавкатов қол күрестен әлемнің 4 дүркін жеңімпазы, М.Байжігіт «Белбеу» күресінен әлем чемпионатының қола жүлдегері болса, Н.Кошкенеб армрестлингтен бірнеше дүркін халықаралық турнирлердің жеңімпазы атанды. В.Старостина «Оқ атудан» әлем кубогының жеңімпазы болса, А.Воропаева мен Д.Хорольский халықаралық турнирлердің бірнеше дүркін жеңімпазы атанды.

Студент С.Рысбекова стенд ату бойынша Азия чемпионатының және Халықаралық жарыстардың жеңімпазы ретінде Олимпиадаға жолдама жеңіп алды, З.Кравченко – қабырғаға атудан дүниежүзілік универсиадааның күміс жүлдегері, Д.Исламбекова – бокстан әлем чемпионатында қола жүлдегері.

Бүгінде 28 мыңға жуық білімгердің ыстық ұясына айналған М.Әуезов атындағы Оңтүстік Қазақстан университеті әлемдегі үздік 450 оқу орнының тізіміне еніп, елімізде 3-орынды иеленді. Материалдық-техникалық базасы бай келелі оқу орнында 2000-ға жуық профессор-оқытушы табысты еңбек етуде.

Садыбек БЕЙСЕНБАЕВ,
М.Әуезов атындағы ОҚУ-дің
қоғаммен байланыс және мәдениет жөніндегі
проректоры.
Әлия МАМЫТ,
студенттерге әлеуметтік қолдау көрсету
бөлімінің басшысы.

